

Iluarsissut
(Saqqummiussissummut 31. juli 2013-mik ullulerneqarsimasumut taartaasoq)
(Kalaallisoortaani oqaatsinik iluarsissutit)

Uunga siunnersuut: Isumaginninnermut suliassaqarfimmi pissaanermik atuineq pillugu Inatsisartut inatsisaat nr. xx, xx 2013-imeersoq

(Ilaqutariinnermut, Inatsisinillu Atuutitsinnermut Naalakkersuisoq)

Saqqummiussissut

(Ilaqutariinnermut, Inatsisinillu Atuutitsinnermut Naalakkersuisoq)

1. Siullermeerneqarnera

Matumuuna Isumaginninnermut suliassaqarfimmi pissaanermik atuineq pillugu Inatsisartut inatsisissaattut siunnersuut Naalakkersuisut saqqummiuppaat.

Inatsisartut inatsisissaattut siunnersuummi matumunnga ilaatigut pineqarput, meeqqanut suliassaqarfimmi pissaanermik atuisarnermi maleruagassat inatsisitigut tunngavilerneqarnissaat, peqatigitillugulu meeqqanik tigummigallagaasinnaanerup periarfissinnissaata pitsaanerulersinneqarnissaa.

Taamaaliornikkut meeqqat inersimasunik pinerluuteqarsimasunik isertitsivimmeeqateqartarnerat pinngitsootinniarlugu. Politiit siornatigut meeqqanut ulloq unnuarlu paaqqinnittarfinnut inissitaasunut attaveqartarnermi nakkutilliinissamut periarfissanik tunngaviusussanik amigaateqartarsimapput. Politiit ilaatigut paasiniaasarnermut tunngatillugu meeqqat kikkunnik attaveqartarsimanerannik misissuinissamut periarfissaqartinneqalissapput.

Misissuinissamulli iliuitsit taamaattut pisariaqartinneqarsimagaangata, siornatigut politiit meeqqanik inersimasut akornanni isertitsivimmi pisariaqartumik tigumminnikkallartarsimapput tamannalu kissaatiginanngikkaluamik iliuserineqartarsimavoq.

Meeqqat pingaarnerusutut tassaapput meeraasut - aamma pinerluuteqarnermik pinartumik iliuseqarsimagaluarunilluunniit. Tamatuma pingaartinneqarnissaa pingaaruteqarpoq. Meeqqat inersimasunut sanilliullutik allanik pisariaqartitsisarput. Taamaattumik pingaaruteqarpoq, meeqqat taakkua ulloq unnuarlu paaqqinniffinniinnissaat, iliussissanik pitsaanerusumik meeqqallu pisariaqartitaannik ilisimasaqarluarfiusuni.

Tamatuma saniatigut siunnersuummi inersimanut pissaanermik atuisarneq naleqqussarneqassaaq. Tamatumani aalajangersakkat nutaarluinnaat pineqarput, innuttaasunut sulisorisanullu inatsisitigut isumannaatsuulersitsisussat.

Pingaaruteqarpoq, inuup nammineerluni aalajangiisussaataitanerata ataqpineqarnissaa, peqatigitilluguli innuttaasunut imminut paarisinnaanngitsunut pingaaruteqarpoq, taakkua pisariaqartumik isumassorneqarnissaasa qulakkeerneqarnissaat. Taamaattumik inersimasunut suliassaqarfimmut Inatsisartut inatsisaat taamaallaat inunnut tarnikkut piginnaasaminnik innarluuteqarlarsimasunut atuutinneqarsinnaavoq.

Pissaanermik atuilluni iliuseqarsinnaanerup aallartinneqarnissaannut tunngaviusussanik siunnersuummi iliuisissanillu arlalinnik saqqummiussaartoqarpoq. Taamaalilluni pinartumik iliuserineqarnernut killiliisoqarpoq, inummut ataasiakkaamut annertuumik sunniuteqartumik.

Suliassaqarfinnut taakkununga amigartumik inatsiseqartitsineq inatsisitigut isumannaatsuunissaq eqqarsaatigalugu ajornartorsiutaasimavoq, tamannalu inatsisikkut matumuuna iluarsineqassaaq.

Inatsisartut inatsisaannik suliarinninnermut periaatsimi danskit inuuniarnikkut kiffartuussineq pillugu inatsisaanni pissaanermik atuneq pillugu kapitali 24 atuutsinneqarsimavoq. Taanna isumassarsivittut aallaaviusimavoq siunnersuummilu aalajangersakkat amerlasuut danskit aalajangersagaannut oqaasertaliussat taamatut oqaasertalersugaapput.

Tamatumunnga peqqutaavoq, Kalaallit Nunaat Danmarkimisut Tunngaviusumik inatsimmi kiffaangissuseqarnissamut aalajangersakkanut kiisalu nunat tamalaat isumaqatigiissutaannut arlalinnut killilersugaammat. Maleruagassat atuutereersut ukiuni arlalinni atuutsinneqarsimasut peqatigitillugulu siunnersuut kalaallini pissutsinut naleqqussagaammat tusarniaanermilu akissuteqaatit assigiinngitsut naapertorlugit, siunnersuut annertuumik tunngavissiisuvoq.

Taamatut oqaaseqarlunga saqqummiussa Inatsisartunut oqaluuserisassanngortippara.